

TARIKH	19 / 3 / 2015	SEKSYEN	DALAM NEGERI
MUKA SURAT	19	RUANGAN	

# Tempoh menunggu haji menjangkau 66 tahun

**SEPANG 18 Mac** - Tempoh menunggu untuk menunaikan haji dijangka semakin panjang sehingga menjangkau 66 tahun berikutkan jumlah yang mendaftar terus meningkat setiap tahun di samping faktor ketiadaan penambahan kuota.

Menteri di Jabatan Perdana Menteri, Datuk Seri Jamil Khir Baharom berkata, buat masa ini kuota jemaah haji Malaysia terpaksa dikurangkan sehingga 20 peratus ekoran kerja-kerja penambahbaikan dan pembesaran kawasan Masjidil Haram yang masih berjalan.

Menurutnya, tempoh menunggu bakal jemaah haji Malaysia semakin panjang kerana jumlah yang mendaftar meningkat kepada 1.7 juta orang.

"Oleh itu, jika kuota masih dikekalkan kepada 28,900 jemaah kemudian terpaksa pula dikurangkan kepada 22,320 kerana kerja-kerja pembesaran Masjidil Haram maka berdasarkan perkiraan itu kita perlu menunggu sehingga tempoh 66 tahun.

"Bagaimanapun, kita telah meminta pertimbangan khusus kerajaan Arab Saudi untuk penambahan kuota. Malah, bagi musim haji tahun ini saya sendiri menyerahkan surat daripada Perdana Menteri, Datuk Seri Najib Tun Razak kepada Raja Arab Saudi, Raja Salman Aziz al-Saud supaya diberikan pertimbangan untuk menambah jumlah jemaah dari Malaysia," katanya.

Beliau berkata demikian ketika tiba di Lapangan Terbang Antarabangsa Kuala Lumpur (KLIA) di sini hari ini.

Beliau kembali ke tanah air selepas menghadiri mesyuarat Menteri-menteri Haji di Arab Saudi semalam.

Menurut Jamil Khir, pihaknya telah dimaklumkan dalam mesyuarat tersebut bahawa jumlah kuota jemaah haji Malaysia 22,320 orang, iaitu sama seperti tahun lalu kerana kerja-kerja pembesaran Masjidil Haram masih lagi berjalan.

Katanya, kerja-kerja pembesaran Masjidil Haram dijangka siap tahun depan

dan selepas itu jumlah kuota jemaah Malaysia akan kembali seperti biasa.

"Selain itu, saya turut menyerahkan surat kepada Menteri Haji dan Wakaf Arab Saudi bagi memohon pertimbangan menambah jumlah jemaah haji. Nampaknya Arab Saudi mengambil perhatian yang tinggi namun kita masih belum mendapat maklum balas.

"Dalam mesyuarat tersebut mereka juga meminta kita menjelaskan bahawa Arab Saudi bukan sengaja mengurangkan jumlah jemaah Malaysia tetapi langkah terbabit terpaksa diambil demi keserasian dan keselamatan jemaah semasa mengerjakan haji," katanya.

Beliau berkata, dalam pertemuan tersebut Arab Saudi juga meminta semua negara menelekankan tahap disiplin yang tinggi terhadap jemaah haji masing-masing bagi mengelak sebarang pengaruh tidak baik seperti unsur-unsur kumpulan militan Negara Islam (IS) dan demonstrasi.